



JUDICIAL **SYSTEM** MONITORING PROGRAMME
PROGRAMA MONITORIZASAUN BA **SISTEMA** JUDISIÁRIU

Komunikadu Imprensa
Tribunál Distritál Dili
06 Maiu 2015

**Tribunál tenke asegura katak sentensa sira iha kazu violénsia
doméstika iha kbit no efeito ba koresaun ema nia atitude**

Iha 04 Maiu 2015, tribunál prova no kondena arguidu VN komete krime hasoru nia feen, iha Distritu Dili.

Durante julgamentu tribunál rona deit deklarasaun hosi lezada relasiona ho faktu agresaun ne'ebé arguidu halo hasoru lezada. Tribunál la konsege rona arguidu tanba durante ne'e notifikasaun ba arguidu maibe arguidu nia sertidaun negativu (la hatene nia diresaun) no antes ne'e tribunál adia julgamentu dala rua ona.

Ministériu Públiku akuza arguidu kontra artigu 145 kona-ba ofensas integridade fisika simples konjuga ho artigu 35 husi Lei Kontra Violénsia Doméstika.

“Violénsia doméstika númeru aas iha fatin hotu-hotu, no JSMP hanoin katak atu prevene krime ne'e, presiza iha sentensa ida ne'ebé rigurozu no forte, atu asegura katak sentensa ne'ebé aplika ba arguidu iha nia kbit atu prevene violénsia doméstika iha sosiedade,” dehan Luis de Oliveira Sampaio, Diretór Ezekutivu JSMP.

Lezada deklara ba tribunál katak iha 14 Maiu 2013 arguidu baku lezada, buti nia kakorok no riba nia ba parede. Kazu ne'e akontese tanba iha fetu ida telefone no fo parabens ba arguidu iha loron ne'ebé arguidu halo tinan, no wainhira lezada husu tuir mak sira hakseskuk malu too arguidu halo violénsia ba lezada.

Aleinde ne'e, iha 15 Maiu 2013 arguidu kontinua tuku iha lezada nia reen-toos, silu lezada nia liman fuan boot, tebe iha kidan, buti iha kakorok no kaer lezada nia liman soe ba uma laran. Aktu ne'e rezulta lezada sofre oin bubu no metan. Hahú husi problema ne'e, arguidu husik hela lezada no ba hola fetu seluk. Wainhira arguidu hatene katak prosesu ne'e iha tribunál, arguidu mós telefone no ameasa bebeik lezada. Lezada mós deklara katak arguidu baku bebeik maibé lezada la halo denunsia tanba hakarak atu proteje sira-nia familia.

JSMP observa katak mezmu arguidu la tuir julgamentu hodi klarifika faktus hirak ne'ebé akuza ba nia, maibé lezada nia deklarasaun bele konsidera sufisiente atu kondena arguidu. JSMP hanoin katak tribunál tenke avalia faktu sira ho klean no sensível, nune'e bele aplika sentensa adekuadu tuir gravidade ne'ebé kauza ba lezada.

Iha alegasaun ministériu públiku haktuir katak arguidu la koopera ho justisa no ameasa bebeik lezada. Tanba ne'e, atu halo prevensaun ba krime violénsia doméstika, husu ba tribunál kondena arguidu ho pena prizaun tinan 3 no suspende ba tinan 5.

Iha parte seluk defeza dehan katak haree ba faktus no sirkunstánsia hotu relasiona ho kazu ne'e husu ba tribunál fo pena ne'ebé kmaan ba arguidu.

Depoide avalia faktus no sirkunstánsia sira ne'ebé partense ba krime ne'e, tribunál konklui no kondena arguidu ho pena prizaun tinan 1 suspende ba tinan 2.

JSMP fiar katak tribunál iha konviksaun rasik atu atribui pena ba arguidu, maibé pena iha kazu ne'e JSMP konsidera laiha efeitu atu hadi'a kondenadu nia hahalok. JSMP prezume katak kondenadu ne'ebé la rona direktamente sentensa husi tribunál nia la sente konsekuénsia husi sentensa ne'e no la iha obrigasaun atu kumpre.

JSMP hanoin katak suspensaun tenke tuir limiti masimu iha artigu 68 alinea 1 kona-ba suspende ezelesaun pena prizaun to'o tinan 5 ho referensia ba alinea 2 kona-ba ajente nia personalidade, sirkunstánsia ne'ebé haleu krime nia prátika, komportamentu anterior, kondisaun kona-ba nia moris, liu-liu komportamentu iha futuru.

Kazu ne'e rejistu ho número prosesu 0182/13/PDDIL, ne'ebé prejidi husi Dra. Jacinta Correia da Costa. Ministériu públiku representa husi Dr. Pedro Baptista nuda'ar prokuradór estajiáriu. Arguidu hetan defeza husi Dr. Rui Manuel Guterres husi eskritóriu defensória públiku.

Luis de Oliveira Sampaio
Diretór Ezekutivu JSMP
Diresaun e-mail: luis@jsmp.minihub.org
Telefone:3323883 | 77295795